

四庫全書

史部

欽定四庫全書

通鑑紀事本末卷三十下

宋 袁樞 撰

武帝之禍

中宗神龍元年春正月壬午朔赦天下改元自文明以來得罪者非揚豫博三州及諸叛逆魁首咸赦除之

太后疾甚麟臺監張易之春官侍郎張昌宗居中用事張柬之崔玄暉與中臺右丞敬暉司刑少卿桓彥範相

王府司馬袁恕已謀誅之東之謂右羽林衛大將軍李多祚曰將軍今日富貴誰所致也多祚泣曰大帝也東之曰今大帝之子為二豎所危將軍不思報大帝之德乎多祚曰苟利國家惟相公處分不敢顧身及妻子因指天地以自誓遂與定謀初東之與荊府長史闕鄉楊元琰相代同泛江至中流語及太后革命事元琰慨然有匡復之志及東之為相引元琰為右羽林將軍謂曰君頗記江中之言乎今日非輕授也東之又用彥範暉

及右散騎侍郎李湛皆為左右羽林將軍委以禁兵易之等疑懼乃更以其黨武攸宜為右羽林大將軍易之等乃安俄而姚元之自靈武至都東之彥範相謂曰事濟矣遂以其謀告之彥範以事白其母母曰忠孝不兩全先國後家可也時太子於北門起居彥範暉謁見密陳其策太子許之癸卯東之立暉彥範與左威衛將軍薛思行等帥左右羽林兵五百餘人至玄武門遣多祚湛及內有即駙馬都尉安陽王同皎詣東宮迎太子太

子疑不出同皎曰先帝以神器付殿下橫遭幽廢人神同憤二十三年矣今天誘其衷北門南牙同心協力以今日誅凶豎復李氏社稷願殿下覽至玄武門以副衆望太子曰凶豎誠當夷滅然上體不安得無驚怛諸公更為後圖李湛曰諸將相不顧家族以徇社稷殿下奈何欲納之鼎鑊乎請殿下自出止之太子乃出同皎扶抱太子上馬從至玄武門斬關而入太后在迎仙宮東之等斬易之昌宗於廡下進至太后所寢長生殿環繞

侍衛太后驚起問曰亂者誰邪對曰張易之昌宗謀反  
臣等奉太子令誅之恐有漏洩故不敢以聞稱兵宮禁  
罪當萬死太后見太子曰乃汝邪小子既誅可還東宮  
彥範進曰太子安得更歸昔天皇以愛子託陛下今年  
齒已長久居東宮天意人心久思李氏羣臣不忘太宗  
天皇之德故奉太子誅賊臣願陛下傳位太子以順天  
人之望李湛義府之子也太后見之謂曰汝亦為誅易  
之將軍邪我於汝父子不薄乃有今日湛慙不能對又

謂崔玄暉曰它人皆因人以進惟卿朕所自擢亦在此  
邪對曰此乃所以報陛下之大德於是收張昌期同休  
昌儀等皆斬之與易之昌宗梟首天津南是日袁恕已  
從相王統南牙兵以備非常收韋承慶房融及司禮卿  
崔神慶繫獄皆易之之黨也初昌儀新作第甚美逾於  
王主或夜書其門曰一日作幾日絡滅去復書之如是  
六七昌儀取筆注其下曰一日亦足乃止甲辰制太子  
監國赦天下以袁恕已為鳳閣侍郎同平章事分遣十

使齋璽書宣慰諸州乙巳太后傳位於太子丙午中宗  
即位赦天下惟張易之黨不原其為周興等所枉者咸  
令清雪子女配沒者皆免之相王加號安國相王拜太  
尉同鳳閣鸞臺三品太平公主加號鎮國太平公主皇  
族先配沒者子孫皆復屬籍仍量叙官爵 丁未太后  
徙居上陽宮李湛留宿衛戊申帝帥百官詣上陽宮上  
太后尊號則天大聖皇帝庚戌以張柬之為夏官尚書  
同鳳閣鸞臺三品崔玄暉為內史袁恕己同鳳閣鸞臺



三品敬暉栢彥範皆為納言並賜爵郡公李多祚賜爵  
遼陽郡王王同皎為右千牛將軍琅邪郡公李湛為右  
羽林大將軍趙國公自餘官賞有差張東之等之討張  
易之也殺中監田歸道將千騎宿玄武門敬暉遣使就  
索千騎歸道先不預謀拒而不與事寧暉欲誅之歸道  
以理自陳乃免歸私第帝嘉其忠壯召拜太僕少卿  
二月辛亥帝帥百官詣上陽宮門太后起居自是每十  
日一往甲寅復國號曰唐郊廟社稷陵寢百官旗幟

服色文字皆如永淳以前故事復以神都為東都北都  
為并州老君為玄元皇帝 乙卯鳳閣侍郎同平章事  
韋承慶貶高要尉正諫大夫同平章事房融除名流高  
州司禮卿崔神慶流欽州 楊再思為戶部尚書同中  
書門下三品西京留守太后之遷上陽宮也太僕卿同  
中書門下三品姚元之獨嗚咽流涕栢彥範張柬之謂  
曰今日豈公涕泣時邪恐公禍由此始元之曰元之事  
則天皇帝久作此辭違悲不能忍且元之前日從公誅

姦逆人臣之義也今日別舊君亦人臣之義也雖獲罪實所甘心是日出為亳州刺史 甲子立妃韋氏為皇后赦天下追贈后父玄貞為上洛王母崔氏為妃左拾遺賈虛已上疏以為異姓不王古今通制今中興之始萬姓喁喁以觀陛下之政而先王后族非所以廣德美於天下也且先朝贈后父太原王殷鑒不遠須防其漸若以恩制已行宜令皇后固讓則益增謙冲之德矣不聽初韋后生邵王重潤長寧安樂二公主上之遷房陵

也安樂公主生於道中上特愛之上在房陵與后同幽  
閉備嘗艱危情愛甚篤上每聞敕使至輒惶恐欲自殺  
后止之曰禍福無常寧失一死何遽如是上嘗與后私  
誓曰異時幸復見天日當惟卿所欲不相禁禦及再為  
皇后遂干預朝政如武后在高宗之世栢彥範上表以  
為易稱無攸遂在中饋貞吉書稱牝雞之晨惟家之索  
伏見陛下每臨朝皇后必施帷幔坐殿上預聞政事臣  
竊觀自古帝王未有與婦人共政而不破國亡身者也

且以陰乘陽違天也以婦陵夫違人也伏願陛下覽古今之戒以社稷蒼生為念今皇后專居宮中治陰教勿出外朝干國政先是胡僧慧範以妖妄遊權貴之門與張易之兄弟善韋后亦重之及易之誅復稱慧範預其謀以功加銀青光祿大夫賜爵上庸縣公出入宮掖上數微行幸其舍彥範復表言慧範執左道以亂政請誅之上皆不聽初武后誅唐宗室有才德者先死惟吳王恪之子鬱林侯千里褊躁無才又數獻符瑞故獨得

免上即位立為成王拜左金吾大將軍武后所誅唐諸  
王妃主駙馬等皆無人葬埋子孫或流竄嶺表或拘囚  
歷年或逃匿民間為人傭保至是制州縣求訪其柩以  
禮改葬追復官爵召其子孫使之承襲無子孫者為擇  
後置之既而宗室子孫相繼而至皆召見涕泣舞蹈各  
以親疎襲爵拜官有差 二張之誅也洛州長史薛季  
昶謂張東之敬暉曰二凶雖除產祿猶在去草不去根  
終當復生二人曰大事已定彼猶机上肉耳夫何能為

所誅已多不可復益也季昶歎曰吾不知死所矣朝邑尉武彊劉幽求亦謂栢彥範敬暉曰武三思尚存公輩終無葬地若不早圖噬臍無及不從上女安樂公主適三思子崇訓上官婉兒者儀之女孫也儀死沒入掖庭辯慧善屬文明習吏事則天愛之自聖歷以後百司表奏多令參決及上即位又使專掌制命益委任之拜為婕妤用事於中三思通焉故黨於武氏又薦三思於韋后引入禁中上遂與三思圖議政事張東之等皆受制

於三思矣上使韋后與三思雙陸而自居旁為之點籌  
三思遂與后通由是武氏之勢復振張東之等數勸上  
誅諸武上不聽東之等曰革命之際宗室諸李誅夷畧  
盡今賴天地之靈陛下返正而武氏濫官僭爵按堵如  
故豈遠近所望邪願頗抑損其祿位以慰天下又不聽  
東之等或撫牀歎憤或彈指出血曰主上昔為英王時  
稱勇烈吾所以不誅諸武者欲使上自誅之以張天子  
之威耳今反如此事勢已去知復奈何上數微服幸武



三思第監察御史清河崔皎密疏諫曰國命初復則天皇  
帝在西宮人心猶有附會周之舊臣列居朝廷陛下奈  
何輕有外遊不察豫且之禍上洩之三思之黨切齒丙  
寅以太子賓客武三思為司空同中書門下三品左  
散騎常侍譙王重福上之庶子也其妃張易之之甥韋  
后惡之譖於上曰重潤之死重福之為也由是貶濮州  
負外刺史又改均州刺史常令州司防守之 丁卯以  
右散騎常侍安定王武攸暨為司徒定王 丁丑武三

思武攸暨固辭新官爵及政事許之並加開府儀同三司 三月甲申制文明以來破家子孫皆復舊資廕唯徐敬業裴炎不在免限 丁亥制酷吏周興來俊臣等已死者追奪官爵存者皆流嶺南惡地 己丑以袁恕已為中書令 制臬氏蟒氏皆復舊姓術士鄭普思尚衣奉御葉靜能皆以妖妄為上所信重夏四月墨敕以普思為秘書監靜能為國子祭酒栢彥範崔玄暉固執不可上曰已用之無容遽改彥範曰陛下初即位下制

云政令皆依貞觀故事貞觀中魏徵虞世南顏師古為  
祕書監孔穎達為國子祭酒豈普思靜能之比乎庚戌  
左拾遺李邕上疏以為詩三百一言以蔽之曰思無邪  
若有神仙能令人不死則秦始皇漢武帝得之矣佛能  
為人福利則梁武帝得之矣堯舜所以為帝王首者亦  
修人事而已尊寵此屬何補於國上皆不聽 上即位  
之日驛召魏元忠於高要丁卯至都拜衛尉卿同平章  
事 甲戌以魏元忠為兵部尚書 乙亥以張東之為

中書令 戊寅追贈故邵王重潤為懿德太子 五月

壬午遷周廟七主於西京崇尊廟制武氏三代諱奏事者皆不得犯 以張柬之等及武攸暨武三思鄭普思等十六人皆為立功之人賜以鐵券自非反逆各恕十死 癸巳敬暉等帥百官上表以為五運迭興事不兩大天授革命之際宗室誅竄殆盡豈得與諸武並封今天命惟新而諸武封建如舊並居京師開闢以來未有斯理願陛下為社稷計順遐邇心降其王爵以安內外

上不許敬暉等畏武三思之讒以考功員外郎崔湜為耳目伺其動靜湜見上親三思而忌暉等乃悉以暉等謀告三思反為三思用三思引為中書舍人湜仁師之孫也先是殿中侍御史南皮鄭愔謫事二張二張敗貶宣州司士叅軍坐賊亡入東都私謁武三思初見三思哭甚哀既而大笑三思素貴重甚怪之愔曰始見大王而哭哀大王將戮死而滅族也後乃大笑喜大王之得愔也大王雖得天子之意彼五人皆據將相之權膽畧

過人廢太后如反掌大王自視勢位與太后孰重彼五人日夜切齒欲噬大王之肉非盡大王之族不足以快其志大王不去此五人危如朝露而晏然尚自以為泰山之安此悖所以為大王寒心也三思大悅與之登樓問自安之策引為中書舍人與崔湜背為三思謀主三思與韋后日夜譖暉等云恃功專權將不利於社稷上信之三思等因為上畫策不若封暉等為王罷其政事外不失尊寵功臣內實奪之權上以為然甲午以侍中

齊公敬暉為平陽王譙公栢彥範為扶陽王中書令漢陽公張柬之為漢陽王南陽公袁恕已為南陽王特進同中書門下三品博陵公崔玄暉為博陵王罷知政事賜金帛鞍馬令朝朔望仍賜彥範姓韋氏與皇后同籍尋又以玄暉檢校益州長史知都督事又改梁州刺史三思令百官復修則天之政不附武氏者斥之為五王所逐者復之大權盡歸三思矣五王之請削武氏諸王也求人為表衆莫肯為中書舍人岑羲為之語甚激切

中書舍人偃師畢構次當讀表辭色明厲三思既得志  
義政祕書少監出構為潤州刺史易州刺史趙履溫栢  
彥範之妻兄也彥範之誅二張稱履溫預其謀召為司  
農少卿履溫以二婢遺彥範及彥範罷政事履溫復奪  
其婢上嘉宋璟忠直累遷黃門侍郎武三思嘗以事屬  
璟璟正色拒之曰今太后既復子明辟王當以侯就第  
何得尚干朝政獨不見產祿之事乎 以韋安石兼檢  
校中書令魏元忠兼檢校侍中又以李湛為右散騎常



侍趙承恩為光祿卿楊元琰為衛尉卿先是元琰知三思浸用事請棄官為僧上不許敬暉聞之笑曰使我早知勸上許之髡去胡頭豈不妙哉元琰多鬚類胡故暉戲之元琰曰功成名遂不退將危此乃由衷之請非徒然也暉知其意瞿然不悅及暉等得罪元琰獨免上官婕妤勸韋后襲則天故事上表請天下士庶為出母服喪三年又請百姓年二十三為丁五十九免役改易制度以收時望制皆許之 癸卯制降諸武梁王三思

為德靜王定王攸暨為樂壽王河內王懿宗等十二人  
皆降為公以厭人心 六月以韋安石為中書令魏元  
忠為侍中楊再思檢校中書令 特進漢陽王張柬之  
表請歸襄州養疾乙未以柬之為襄州刺史不知州事  
給全俸 冬十月辛未以魏元忠為中書令楊再思為  
侍中 十一月壬寅則天崩於上陽宮年八十二遺制  
去帝號稱則天大聖皇后王蕭二族及褚遂良韓瑗柳  
奭親屬皆赦之上居諒陰以魏元忠攝冢宰三日元忠

素負忠直之望中外賴之武三思憚之矯太后遺制慰諭元忠賜實封百戶元忠捧制感咽涕泗見者曰事去矣十二月丁卯上始御同明殿見羣臣

二年春閏正月武三思以敬暉栢彥範袁恕己尚在京師忌之乙卯出為滑洛豫三州刺史 二月丙申僧慧

範等九人並加五品階賜爵郡縣公道士史崇恩等三人加五品階除國子祭酒同正葉靜能加金紫光祿大夫初少府監丞弘農宋之問及弟兗州司倉之遜皆

坐附會張易之貶嶺南逃歸東都匿於友人光祿卿駙  
馬都尉王同皎家同皎疾武三思及韋后所為每與所  
親言之輒切齒之遜於簾下聞之密遣其子曇及甥校  
書郎李悛告三思欲以自贖三思使曇悛及撫州司倉  
冉祖雍上書告同皎與洛陽人張仲之祖延慶武當丞  
壽春周憬等潛結壯士謀殺三思因勒兵詣闕廢皇后  
上命御史大夫李承嘉監察御史姚紹之按其事又命  
楊再思李嶠韋巨源參驗仲之言三思罪狀事連宮壺

再思巨源陽寐不聽嶠與紹之命反接送獄仲之還顧  
言不已紹之命槌之折其臂仲之大呼曰吾已負汝死  
當訟汝於天三月庚戌同皎等皆坐斬籍沒其家周憬  
亡入比干廟中大言曰比干古之忠臣知吾此心三思  
與皇后淫亂傾危國家行當梟首都市恨不及見耳遂  
自剄之問之遜曇俊祖雍並除京官加朝散大夫 武  
三思與韋后日夜譖敬暉等不已復左遷暉為朗州刺  
史崔玄暉為均州刺史栢彥範為亳州刺史袁恕己為

郢州刺史與暉等同立功者薛思行等皆以為黨與坐貶夏四月處士京兆韋月將上書告武三思潛通宮掖必為逆亂上大怒命斬之黃門侍郎宋璟奏請推按上益怒不及整巾屣履出側門謂璟曰朕謂已斬乃猶未邪命趨斬之璟曰人言中宮私於三思陛下不問而誅之臣恐天下必有竊議固請按之上不許璟曰必欲斬月將請先斬臣不然臣終不敢奉詔上怒少解左御史大夫蘇珣給事中徐堅大理卿長安尹思貞皆以為

方夏行戮有違時令上乃命與杖流嶺南過秋分一日  
平曉廣州都督周仁軌斬之御史大夫李承嘉附武三  
思詆尹思貞於朝思貞曰公附會姦臣將圖不軌先除  
忠臣邪承嘉怒劾奏思貞出為青州刺史或謂思貞曰  
公平日訥於言及廷折承嘉何其敏邪思貞曰物不能  
鳴者激之則鳴承嘉恃威權相陵僕義不受屈亦不知  
言之從何而至也武三思惡宋璟出之檢校貝州刺史  
五月武三思使鄭愔告朗州刺史敬暉亳州刺史韋

彥範襄州刺史張柬之郢州刺史袁恕已均州刺史崔  
玄暉與王同皎通謀六月戊寅貶暉崖州司馬彥範瀧  
州司馬柬之新州司馬恕已賓州司馬玄暉白州司馬  
並員外置仍長任削其勲封復彥範姓栢氏 秋七月  
戊申立衛王重俊為皇太子 武三思陰令人疏皇后  
穢行勝於天津橋請加廢黜上大怒命御史大夫李承  
嘉窮覈其事承嘉奏言敬暉栢彥範張柬之袁恕已崔  
玄暉使人為之雖云廢后實謀大逆請族誅之三思又



使安樂公主諧之於內侍御史鄭愔言之於外上命法  
司結竟大理丞三原李朝隱奏稱暉等未經推鞠不可  
遽就誅夷大理丞裴諉奏稱暉等宜據制書處斬籍沒  
不應更加推鞠上以暉等嘗賜鐵券許以不死乃長流  
暉於瓊州彥範於瀛州東之於瀧州恕已於環州玄暉  
於古州子弟年十六以上皆流嶺外擢承嘉為金紫光  
祿大夫進爵襄武郡公諱為刑部尚書出李朝隱為聞  
喜令三思又諷太子上表請夷暉等三族上不許中書

舍人崔湜說三思曰暉等異日北歸終為後患不如遣使矯制殺之三思問誰可使者湜薦大理正周利用利用先為五王所惡貶嘉州司馬乃以利用攝右臺侍御史奉使嶺外比至東之玄暉已死遇彥範於貴州令左右縛之曳於竹槎之上肉盡至骨然後杖殺得暉髑而殺之恕已素服黃金利用逼之使飲野葛汁盡數升不死不勝毒憤拊地爪甲殆盡仍捶殺之利用還擢拜御史中丞薛季昶累貶詹州司馬飲藥死三思既殺五王

權傾人主常言我不知代間何者謂之善人何者謂之惡人但於我善者則為善人於我惡者則為惡人耳時兵部尚書宗楚客將作大匠宗晉卿太府卿紀處訥鴻臚卿甘元東皆為三思羽翼御史中丞周利用侍御史冉祖雍太僕丞李俊光祿丞宋之遜監察御史姚紹之皆為三思耳目時人謂之五狗安樂公主恃寵驕恣賣官鬻獄權傾朝野或自為制敕掩其文令上署之上笑而從之竟不視也自請為皇太女上雖不從亦不譴

責

景龍元年皇后以太子重俊非其所生惡之特進德靜王武三思尤忌太子上官婕妤以三思故每下制敕推尊武氏安樂公主與駙馬左衛將軍武崇訓常陵侮太子或呼為奴崇訓又教公主言於上請廢太子立己為皇太女太子積不能平秋七月辛丑太子與左羽林大將軍李多祚將軍李思冲李承况獨狐禕之沙吒忠義等矯制發羽林千騎兵三百餘人殺三思崇訓于其第

并親黨十餘人又使左金吾大將軍成王千里及其子  
天水王禧分兵守宮城諸門太子與多祚引兵自肅章  
門斬關而入叩閣索上官婕妤婕妤大言曰觀其意欲  
先索婉兒次索皇后次及大家上乃與韋后安樂公主  
上官婕妤登玄武門樓以避兵鋒使左羽林大將軍劉  
景仁帥飛騎百餘人屯於樓下以自衛楊再思蘇瓌李  
嶠與兵部尚書宗楚客左衛將軍紀處訥擁兵二千餘  
人屯太極殿前閉門自守多祚先至玄武樓下欲升樓

宿衛拒之多祚與太子狐疑按兵不戰冀上問之宮闈  
令石城楊思勗在上側請擊之多祚壻羽林中郎將野  
呼利為前鋒總管思勗挺刃斬之多祚軍奪氣上據檻  
俯謂多祚所將千騎曰汝輩皆朕宿衛之士何為從多  
祚反苟能斬反者勿患不富貴於是千騎斬多祚承況  
禕之忠義餘衆皆潰成王千里天水王禧攻右延明門將  
殺宗楚客紀處訥不克而死太子以百騎走終南山至  
鄠西能屬者纔數人憩於林下為左右所殺上以其首

獻太廟及祭三思崇訓之柩然後梟之朝堂更成王干里姓曰蝮氏同黨皆伏誅東宮僚屬無敢近太子尸者唯永和縣丞竄嘉勗解衣裹太子首號哭貶興平丞太子兵所經諸門首者皆坐流韋氏之黨奏請悉誅之上更命法司推斷大理卿宋城鄭惟忠曰大獄始決人心未安若復有改推則反仄者衆矣上乃止以楊思勗為銀青光祿大夫行內常侍癸卯赦天下贈武三思太尉梁宣王武崇訓開府儀同三司魯忠王安樂公主請用

永泰公主故事以崇訓墓為陵給事中盧粲駁之以為  
永泰事出特恩今魯王主壻不可為比上手敕曰安樂  
與永泰無異同穴之義今古不殊粲又奏以為陛下以  
膝下之愛施及其夫豈可無上下無辯君臣一貫哉上  
乃從之公主怒出粲為陳州刺史襄邑尉襄陽席豫聞  
安樂公主求為太女歎曰梅福譏切王氏獨何人哉乃  
上書請立太子言甚深切太平公主欲表為諫官豫恥  
之逃去八月皇后及王公已下表上尊號曰應天神



龍皇帝改玄武門為神武門樓為制勝樓宗楚客又帥百官表請加皇后尊號曰順天翊聖皇后上並許之

初右臺大夫蘇珣治太子重俊之黨因有引相王者珣密為之申理上乃不問自是安樂公主及兵部尚書宗楚客日夜謀誅相王使侍御史冉祖雍等誣奏相王及太平公主云與重俊通謀請收付制獄上召吏部侍郎兼御史中丞蕭至忠使鞠之至忠泣曰陛下富有四海不能容一弟一妹而使人羅織害之乎相王昔為皇嗣

固請於則天以天下讓陛下累日不食此海內所知奈何以祖雍一言而疑之上素友愛遂寢其事右補闕浚儀吳兢聞祖雍之謀上疏以為自文明以來國之祚胤不絕如綫陛下龍興恩及九族求之瘴海升之闕庭況相王同氣至親六合無貳而賊臣日夜連謀乃欲陷之極法禍亂之根將由此始夫任以權則雖疎必重奪其勢則雖親必輕自古委信異姓猜忌骨肉以覆國亡家者幾何人矣況國家枝葉無幾陛下登極未久而一子

以弄兵受誅一子以愆違遠竄惟餘一弟朝夕左右尺布斗粟之譏不可不慎青蠅之詩良可畏也相王寬厚恭謹安恬好讓故經武韋之世竟免於難初右僕射中書令魏元忠以武三思擅權意常憤鬱及太子重俊起兵遇元忠子太僕少卿升於永安門脅以自隨太子死升為亂兵所殺元忠揚言曰元惡已死雖鼎鑊何傷但惜太子隕沒耳上以其有功且為高宗武后所重故釋不問兵部尚書宗楚客太府卿紀處訥等共證元忠

云與太子通謀請夷其三族制不許元忠懼表請解官  
爵以散秩還第丙戌上手敕聽解僕射以特進齊公致  
仕仍朝朔望 九月丁卯以吏部侍郎蕭至忠為黃門  
侍郎兵部尚書宗楚客為左衛將軍兼太府卿紀處訥  
為太府卿並同中書門下三品 宗楚客等引右衛郎  
將姚廷筠為御史中丞使劾奏魏元忠以為侯君集社  
稷元勲及其謀反太宗就羣臣乞其命而不得竟流涕  
斬之其後房遺愛薛萬徹齊王祐等為逆雖復懿親皆

從國法元忠功不逮君集身又非國戚與李多祚等謀反男入逆徒是宜赤族污官但有朋黨飾辭營救以惑聖德陛下仁恩欲掩其過臣所以犯龍鱗忤聖意者正以事關宗社耳上頗然之元忠坐繫大理貶渠州司馬宗楚客令給事中冉祖雍奏言元忠既犯大逆不應出佐渠州楊再思李嶠亦贊之上謂再思等曰元忠驅使日久朕特矜容制命已行豈宜數改輕重之權應自朕出卿等頻奏殊非朕意再思等惶懼拜謝監察御史袁

守一復表彈元忠曰重俊乃陛下之子猶加昭憲元忠  
非勲非戚焉得獨漏嚴刑甲辰又貶元忠務川尉頃之  
楚客又令袁守一奏言則天昔在上陽宮不豫狄仁傑  
奏請陛下監國元忠密奏以為不可此則元忠懷逆日  
久請加嚴誅上謂楊再思等曰以朕思之人臣事主必  
在一心豈有主上小疾遽請太子知事此乃仁傑欲樹  
私恩未見元忠有失守一欲借前事以陷元忠其可乎  
楚客乃止元忠行至涪陵而卒 銀青光祿大夫上庸

公聖善中天西明三寺主慧範於東都作聖善寺長樂坡作大像府庫為之虛耗上及韋后皆重之勢傾內外無敢指目者戊申侍御史魏傳弓發其姦贓四十餘萬請寘極法上欲宥之傳弓曰刑賞國之大事陛下賞已妄加豈宜刑所不及上乃削黜慧範放于家宦官左監門大將軍薛簡等有寵於安樂公主縱暴不法傳弓奏請誅之御史大夫竇從一懼固止之時宦官用事從一為雍州刺史及御史大夫誤見訟者無須必曲加承接

二年春二月庚寅宮中言皇后衣笥裙上有五色雲起  
上令圖以示百官韋巨源請布之天下從之仍赦天下  
迦葉志忠奏昔神堯皇帝未受命天下歌桃李子文武  
皇帝未受命天下歌秦王破陣樂天皇帝大帝未受命天  
下歌堂堂則天皇后未受命天下歌娥媚娘應天皇帝  
未受命天下歌英王石州順天皇后未受命天下歌桑  
條韋蓋天意以順天皇后宜為國母主蠶桑之事謹上  
桑韋歌十二篇請編之樂府皇后祀先蠶則奏之太常



卿鄭愔又引而申之上悅皆愛厚賞右補闕趙延禧上言周唐一統符命同歸故高宗封陛下為周王則天時唐同泰獻洛水圖孔子曰其或繼周者雖百代可知也陛下繼則天子孫當百代王天下上悅擢延禧為諫議大夫秋七月安樂長寧公主及皇后妹邠國夫人上官婕妤婕妤母沛國夫人鄭氏尚宮柴氏賀婁氏女丑第五英兒隴西夫人趙氏皆依勢用事請謁受賕雖屠沽城獲用錢三十萬則別降墨敕除官斜封付中書時

人謂之斜封官錢三萬則度為僧尼其貲外同正試攝  
檢校判知官凡數千人西京東都各置兩吏部侍郎為  
四銓選者歲數萬人上官婕妤及後宮多立外第出入  
無節朝士往往從之遊處以求進達安樂公主尤驕橫  
宰相以下多出其門與長寧公主競起第舍以侈麗相  
高擬於宮掖而精巧過之安樂公主請昆明池上以百  
姓蒲魚所資不許公主不悅乃更奪民田作定昆池延  
袤數里累石象華山引水象天津欲以勝昆明故名定

毘安樂有織成裙直錢一億花卉鳥獸皆如粟粒正視  
旁視日中影中各為一色上好擊毬由是風俗相尚駙  
馬武崇訓楊慎交灑油以築毬楊慎交恭仁曾孫也上  
及皇后公主多營佛寺左拾遺京兆辛替否上疏諫略  
曰臣聞古之建官負不必備士有完行家有廉節朝廷  
有餘俸百姓有餘食伏惟陛下百倍行賞十倍增官金  
銀不供其印束帛不充於錫遂使富商豪賈盡居纓冕  
之流鶯伎行巫或涉膏腴之地又曰公主陛下之愛女

然而用不合於古義行不根於人心將恐變愛成憎翻  
福為禍何者竭人之力費人之財奪人之家愛數子而  
取三怨使邊疆之士不盡力朝廷之士不盡忠人之散  
矣獨恃所愛何所恃乎君以人為本本固則邦寧邦寧  
則陛下之夫婦母子長相保也又曰若以造寺必為理  
體養人不足經邦則殷周已往皆暗亂漢魏已降皆聖  
明殷周已往為不長漢魏已降為不短矣陛下緩其所  
急急其所緩親未來而疎見在矣真實而冀虛無重俗

人之為輕天子之業雖以陰陽為炭萬物為銅役不食  
之人使不衣之士猶尚不給況資於天生地養風動雨  
潤而後得之乎一旦風塵再擾霜雹荐臻沙彌不可操  
干戈寺塔不足攘飢饉臣竊惜之疏奏不省時斜封官  
皆不由兩省而授兩省莫敢執奏即宣示所司吏部負  
外郎李朝隱前後執破一千四百餘人怨謗紛然朝隱  
一無所顧 冬十月己酉修文館直學士起居舍人武  
平一上表請抑損外戚權寵不敢斥言韋氏但請抑損

已家上優制不許上以安樂公主適左衛中郎將武延秀初武崇訓之尚公主也延秀數得侍宴延秀美姿儀善歌舞公主悅之及崇訓死遂以延秀尚焉己卯成禮假皇后仗分禁兵以盛其儀衛命安國相王障車庚辰赦天下以延秀為太常卿兼右衛將軍辛巳宴羣臣于兩儀殿命公主出拜公卿公卿皆伏地稽首

三年 太平安樂公主各樹朋黨更相譖毀上患之十一月癸亥上謂修文館直學士武平一曰比聞內外親

貴多不輯睦以何法和之平一以為此由讒諂之人陰為離間宜深加誨諭斥逐姦險若猶未已伏願捨近圖遠抑慈存嚴示以知禁無令積惡上賜平一帛而不能用其言

睿宗景雲元年春正月丙寅夜中宗與韋后微行觀燈於市里又縱宮女數千人出遊多不歸者初則天之世長安城東隅民王純家井溢浸成大池數十頃號隆慶池相王子五王列第於其北望氣者言常鬱鬱有帝

王氣比日尤盛乙未上幸隆慶池結綵為樓宴侍臣泛  
舟戲象以厭之定州人郎岌上言韋后宗楚客將為逆  
亂韋后白上杖殺之五月丁卯許州司兵參軍偃師燕  
欽融復上言皇后淫亂干預國政宗族疆盛安樂公主  
武延秀宗楚客圖危宗社上召欽融面詰之欽融頓首  
抗言神色不撓上默然宗楚客矯制令飛騎撲殺之投  
於殿庭石上折頸而死楚客大呼稱快上雖不窮問意  
頗怏怏不悅由是韋后及其黨始憂懼散騎常侍馬秦



客以醫術光祿少卿楊玘以善烹調皆出入宮掖得幸於韋后恐事泄被誅安樂公主欲韋后臨朝自為皇太女乃相與合謀於餅餠中進毒六月壬午中宗崩於神龍殿韋后祕不發喪自總庶政癸未召諸宰相入禁中徵諸府兵五萬人屯京城使駙馬都尉韋捷韋灌衛尉卿韋璿左千牛中郎韋錡長安令韋播郎將高嵩等分領之璿溫之族弟播從子嵩其甥也中書舍人韋元微巡六街又命左監門大將軍兼內侍薛思簡等將兵五

百人馳驛戍均州以備譙王重福以刑部尚書裴談工部尚書張錫並同中書門下三品仍充東都留守吏部尚書張嘉福中書侍郎岑義吏部侍郎崔湜並同平章事義長倩之子也太平公主與上官昭容謀草遺制立溫王重茂為皇太子皇后知政事相王旦參謀政事宗楚客密謂韋溫曰相王輔政於理非宜且於皇后嫂叔不通問聽朝之際何以為禮遂帥諸宰相表請皇后臨朝罷相王政事蘇瓌曰遺詔豈可改邪溫楚客怒瓌懼

而從之乃以相王為太子太師甲申梓宮遷御太極殿  
集百官發喪皇后臨朝攝政赦天下改元唐隆進相王  
旦為太尉雍王守禮為幽王壽春王成器為宋王以從  
人望命韋溫總知內外守捉兵馬事丁亥殤帝即位時  
年十六尊皇后為皇太后立妃陸氏為皇后壬辰命紀  
處訥持節巡撫關內道岑羲河南道張嘉福河北道宗  
楚客與太常卿武延秀司農卿趙履溫國子祭酒葉靜  
能及諸韋共勸韋后遵武后故事南北衛軍臺閣要司

皆以韋氏子弟領之廣聚黨衆中外連結楚客又密上書稱引圖讖謂韋氏宜革唐命謀害殤帝深忌相王及太平公主密與韋溫安樂公主謀去之相王子臨淄王隆基先罷潞州別駕在京師陰聚才勇之士謀匡復社稷初太宗選官戶及蕃口驍勇者著虎文衣跨豹文韉從遊獵於馬前射禽獸謂之百騎則天時稍增為千騎隸左右羽林中宗謂之萬騎置使以領之隆基皆厚結其豪傑兵部侍郎崔日用素附韋武與宗楚客善知楚

客謀恐禍及已遣寶昌寺僧普潤密詣隆基告之勸其速發隆基乃與太平公主及公主子衛尉卿薛崇暕苑總監贛人鍾紹京尚衣奉御王崇暉前朝邑尉劉幽求利仁府折衝麻嗣宗謀先事誅之韋播高嵩數榜捶萬騎欲以立威萬騎皆怨果殺葛福順陳玄禮見隆基訴之隆基諷以誅諸韋皆踴躍請以死自效萬騎果殺李仙兒亦預其謀或謂隆基當啓相王隆基曰我曹為此以徇社稷事成福歸於王不成以身死之不以累王也

今啓而見從則王預危事不從將敗大計遂不啓庚子  
晡時隆基微服與幽求等入苑中會鍾紹京解舍紹京  
悔欲拒之其妻許氏曰忘身徇國神必助之且同謀素  
定今雖不行庸得免乎紹京乃趨出拜謁隆基執其手  
與坐時羽林將士皆屯玄武門逮夜葛福順李仙鳧皆  
至隆基所請號而行向二鼓天星散落如雪劉幽求曰  
天意如此時不可失福順拔劍直入羽林營斬韋璿韋  
璿高嵩以徇曰韋后酖殺先帝謀危社稷今夕當共誅

諸韋馬鞭以上皆斬之立相王以安天下敢有懷兩端  
助逆黨者罪及三族羽林之士皆欣然聽命乃送璿等  
首於隆基隆基取火視之遂與幽求等出苑南門紹京  
帥丁匠二百餘人執斧鋸以從使福順將左萬騎攻玄  
德門仙鳧將右萬騎攻白獸門約會於凌煙閣前即大  
譟福順等殺守門將斬關而入隆基勒兵玄武門外三  
鼓聞譟聲帥總監及羽林兵而入諸衛兵在太極殿宿  
衛梓宮者聞譟聲皆被甲應之韋后惶惑走入飛騎營

有飛騎斬其首獻於隆基安樂公主方照鏡畫眉軍士  
斬之斬武延秀於肅章門外斬內將軍賀婁氏於太極  
殿西初上官昭容引其從母之子王昱為左拾遺昱說  
昭容母鄭氏曰武氏天之所廢不可興也今婕妤附於  
三思此滅族之道也願姨思之鄭氏以戒昭容昭容弗  
聽及太子重俊起兵誅三思索昭容昭容始懼思昱言  
自是心附帝室與安樂公主各樹朋黨及中宗崩昭容  
草遺制立溫王以相王輔政宗韋改之及隆基入宮昭



客執燭帥宮人迎之以制草示劉幽求幽求為之言隆基不許斬於旗下時少帝在太極殿劉幽求曰衆約今夕共立相王何不早定隆基遽止之捕索諸韋在宮中及守諸門并素為韋后所親信者皆斬之比曉內外皆定辛巳隆基出見相王叩頭謝不先啓之罪相王抱之泣曰社稷宗廟不墜於地汝之力也遂迎相王入輔少帝閉宮門及京城門分遣萬騎收捕諸韋親黨斬太子少保同中書門下三品韋溫於東市之北中書令宗楚

客衣斬衰乘青驢逃出至通化門門者曰公宗尚書也  
去布帽執而斬之并斬其弟晉卿相王奉少帝御安福  
門慰諭百姓初趙履溫傾國資以奉安樂公主為之起  
第舍築臺穿池無休已擲紫衫以項挽公主犢車公主  
死履溫馳詣安福樓下舞蹈稱萬歲聲未絕相王命萬  
騎斬之百姓怨其勞役爭割其肉立盡祕書監汴王邕  
娶韋后妹崇國夫人與御史大夫竇從一各手斬其妻  
首以獻邕鳳之孫也左僕射同中書門下三品韋巨源

聞亂家人勸之逃匿巨源曰吾位大臣豈可聞難不赴  
出至都街為亂兵所殺時年八十於是梟馬秦客楊均  
葉靜能等首尸韋后於市崔日用將兵誅諸韋於杜曲  
襁褓兒無免者諸杜濫死非一是日赦天下云逆賊魁  
首已誅自餘支黨一無所問以臨淄王隆基為平王兼  
知內外閑廐押左右廂萬騎薛崇暕賜爵立節王以鍾  
紹宗守中書侍郎劉幽求守中書舍人並參知機務麻  
嗣宗行左金吾衛中郎將武氏宗屬誅死流竄殆盡侍

中紀處訥行至華州吏部尚書同平章事張嘉福行至  
懷州皆收斬之壬寅劉幽求在太極殿有宮人與宦官  
令幽求作制書立太后幽求曰國有大難人情不安山  
陵未畢遽立太后不可平王隆基曰此勿輕言遣十道  
使齎璽書宣撫及詣均州宣慰譙王重福貶竇從一為  
濠州司馬罷諸公主府官癸卯太平公主傳少帝命請  
讓位於相王相王固辭以平王隆基為殿中監同中書  
門下三品以宋王成器為左衛大將軍衡陽王成義為

右衛大將軍巴陵王隆範為左羽林大將軍彭城王隆業為右羽林大將軍光祿少卿嗣道王徽檢校右金吾衛大將軍徽元慶之孫也以黃門侍郎李日知中書侍郎鍾紹宗並同平章門下三品太平公主之子薛崇訓為右千牛衛將軍隆基有二奴王毛仲李守德皆趨勇善騎射常侍衛左右隆基之入苑中也毛仲避匿不從事定數日方歸隆基不之責仍超拜將軍毛仲本高麗也汴王邕敗沁州刺史左散騎常侍駙馬都尉楊慎交

貶巴州刺史中書令蕭至忠貶許州刺史兵部尚書同  
中書門下三品韋嗣立貶宋州刺史中書侍郎同平章  
事趙彥昭貶絳州刺史吏部侍郎同平章事崔湜貶華  
州刺史劉幽求言於宋王成器平王隆基曰相王疇昔  
已居宸極羣望所屬今人心未安家國事重相王豈得  
尚守小節不早即位以鎮天下乎隆基曰王性恬淡不  
以代事嬰懷雖有天下猶讓於人況親兄之子安肯代  
之乎幽求曰衆心不可違王雖欲高居獨善其如社稷

何成罷隆基入見相王極言其事相王乃許之甲辰少  
帝在太極殿東隅西向相王立於梓宮旁太平公主曰  
皇帝欲以此位讓叔父可乎幽求跪曰國家多難皇帝  
仁孝追蹤堯舜誠合至公相王代之任重慈愛尤厚矣  
乃以少帝制傳位相王時少帝猶在御座太平公主進  
曰天下之心以歸相王此非兒座遂提下之睿宗即位  
御承天門赦天下復以少帝為溫王以鍾紹京為中書  
令上將立太子以宋王成器嫡長而平王隆基有大

功疑不能決成器辭曰國家安則先嫡長國家危則先  
有功苟違其宜四海失望臣死不敢居平王之上涕泣  
固請者累日大臣亦多言平王功大宜立劉幽求曰臣  
聞除天下之禍者當享天下之福平王拯社稷之危救  
君親之難論功莫大語德最賢無可疑者上從之丁未  
立平王隆基為太子隆基復表讓成器不許則天大聖  
皇后復舊號為天后追謚雍王賢曰章懷太子 戊申  
以宋王成器為雍州牧揚州大都督太子太師 置溫



王重茂於內宅 追削武三思武崇訓爵謚斲棺暴尸

平其墳墓 越州長史宋之問饒州刺史冉祖雍坐謫

附韋武皆流嶺表 追贈郎岌燕欽融諫議大夫 秋

七月庚戌朔贈韋月將宣州刺史 癸丑以兵部侍郎

崔日用為黃門侍郎參知機務 追復故太子重俊位

號雪敬暉栢彥範崔玄暉張柬之袁恕己成王千里李

多祚等罪復其官爵 丁巳以洛州長史宋璟檢校吏

部尚書同中書門下三品岑義罷為右散騎常侍兼刑

部尚書璟與姚元之協心革中宗弊政進忠良退不肖  
賈罰盡公請託不行綱紀修舉當時翕然以為復有貞  
觀永徽之風 壬戌崔湜罷為尚書左丞 黃門侍郎

參知機務崔日用與中書侍郎參知機務薛稷爭於上  
前稷曰日用傾側鼎附三思非忠臣賣友邀功非義士  
日用曰臣往雖有過今立大功稷外託國姻內附張易  
之宗楚客非傾側而何上由是兩罷之戊辰以日用為  
雍州長史稷為左散騎常侍 己巳赦天下改元凡韋

氏餘黨未施行者咸赦之 乙亥廢武氏崇恩廟及昊

陵順陵追廢韋后為庶人安樂公主為悖逆庶人 韋

后之臨朝也吏部侍郎鄭愔貶江州司馬潛過均州與

刺史譙王重福及洛陽人張靈均謀舉兵誅韋氏未發

而韋氏敗重福遷集州刺史未行靈均說重福曰大王

地居嫡長當為天子相王雖有功不當繼統東都士庶

皆願王來王若潛入洛陽發左右屯營兵襲殺留守據

東都如從天而下也然後西取陝州東取河南北天下

指麾可定重福從之靈均乃密與愔結謀聚徒數十人  
時愔自祕書少監左遷沅州刺史遲留洛陽以俟重福  
為重福草制立重福為帝改元為中元克復尊上為皇  
季叔以溫王為皇太弟愔為左丞相知內外文事靈均  
為右丞相天柱大將軍知武事右散騎常侍嚴善思為  
禮部尚書知吏部事重福與靈均詐乘驛東都愔先供  
張駙馬都尉裴巽第以待重福洛陽縣官微聞其謀  
八月庚寅往巽第按問重福奄至縣官馳出白留守羣

官皆逃匿洛州長史崔日知獨帥衆討之留臺侍御史  
李邕遇重福於天津橋從者已數百人馳之營屯告之  
曰譙王得罪先帝今無故入都此必為亂君等宜立功  
取富貴又告皇城使閉諸門重福先趣左右屯營營中  
射之矢如雨下乃還趣左掖門欲取留守兵見門閉大  
怒命焚之火未及然左屯營兵出逼之重福窘迫策馬  
出上東逃匿山谷明日留守大出兵搜捕重福赴漕渠  
溺死日知日用之從父兄也以功拜東都留守鄭愔貌

醜多須既敗梳髻著婦人服匿車中擒獲被鞠股慄不能對張靈均神氣自若顧愔曰吾與此人舉事宜其敗也與愔皆斬於東都市初愔附來俊臣得進俊臣誅附張易之易之誅附韋氏韋氏敗又附譙王重福竟坐族誅嚴善思免死流靜州姚元之宋璟及御史大夫畢構上言先朝斜封官悉宜停廢上從之癸巳罷斜封官凡數千人贈蘇安恒諫議大夫冬十月謚故太子重俊曰節愍大府少卿萬年韋湊上書以為賞罰所不

加者則考行立謚以褒貶之故太子重俊與李多祚等稱兵入宮中宗登玄武門以避之太子據鞍督兵自若及其徒倒戈多祚等死太子方逃竄昇使宿衛不守其為禍也胡可忍言明日中宗雨泣謂供奉官曰幾不與卿等相見其危如此今聖朝禮葬謚為節愍臣竊惑之夫臣子之禮過廟必下過位必趨漢成帝之為太子不敢絕馳道而重俊稱兵宮內跨馬御前無禮甚矣若以其誅武三思父子而嘉之則興兵以誅姦臣而尊君父

可也今欲自取之是與三思競為逆也又足嘉乎若以其欲廢韋氏而嘉之則韋氏於時逆狀未彰大義未絕苟無中宗之命而廢之是脅父廢母也庸可乎漢戾太子困於江充之讒發憤殺充雖興兵交戰非圍逼君父也兵敗而死及其孫為天子始得改葬猶謚曰戾沉重俊可謚之曰節愍乎臣恐後之亂臣賊子得引以為比開悖逆之原非所以彰善癉惡也請改其謚多祚等從重俊興兵不為無罪陛下今宥之可也名之為雪亦所



未安上甚然其言而執政以為制命已行不為追改但  
停多祚等贈官而已十一月己酉葬孝和皇帝于定  
陵廟號中宗朝議以韋后有罪不應附葬追謚故英王  
妃趙氏曰和思順聖皇后求其瘞莫有知者乃以禕衣  
招魂覆以夷衾祔葬定陵

太平公主謀逆

高宗開耀元年初太原王妃之薨也天后請以太平  
公主為女宮以追福及吐蕃求和親請尚太平公主上

乃為之立太平觀以公主為觀主以拒之至是始選光祿卿汾陰薛曜之子紹尚焉紹母太宗女城陽公主也秋七月公主適薛氏自興安門南至宣陽坊西燎炬相屬夾路槐木多死紹兄顓以公主寵盛深憂之以問族祖戶部郎中克構克構曰帝甥尚主國家故事苟以恭慎行之亦何傷然諺曰娶婦得公主無事取官府不得為之懼也天后以顓妻蕭氏及顓弟緒妻成氏非貴族欲出之曰我女豈可使與田舍女為妯娌耶或曰蕭

氏瑀之姪孫國家舊姻乃止

則天垂拱四年琅瑯王沖之敗也濟州刺史薛顗顗弟緒緒與駙馬都尉紹坐與琅邪王沖通謀顗緒皆伏誅紹以太平公主故杖一百餓死於獄天授元年太后欲以太平公主妻其伯父士讓之孫攸暨攸暨時為右衛中郎將太后潛使人殺其妻而妻之公主方額廣頤多權略太后以為類己寵愛特厚常與密議天下事舊制食邑諸王不過千戶公主不過三百五十戶太平食邑

獨累加至三千戶

睿宗景雲元年太平公主沈敏多權略武后以為類已  
故於諸子中獨愛韋頗得預密謀然尚畏武后之嚴未  
敢招權勢及誅張易之公主有力焉中宗之世韋后安  
樂公主皆畏之又與太子共誅韋氏既屢立大功益尊  
重上常與之圖議大政每入奏事坐語移時或時不朝  
謁則宰相就第浴之每宰相奏事上輒問嘗與太平議  
否又問與三郎議否然後可之三郎謂太子也公主所

欲上無不聽自宰相以下進退繫其一言其餘薦士驟  
歷清顯者不可勝數權傾人主趨附其門者如市子薛  
崇行崇敏崇簡皆封王田園遍於近甸收市營造諸器  
玩遠至嶺蜀輸送者相屬於路居處奉養擬於宮掖

太平公主以太子年少意頗易之既而憚其英武欲更  
擇闇弱者立之以久其權數為流言云太子非長不當  
立己亥制戒諭中外以息浮議公主每覬伺太子所為  
纖介聞於上太子左右亦徃徃為公主耳目太子深不

自安

二年太平公主與益州長史竇懷貞等結為朋黨欲以危太子使其壻唐駿邀韋安石至其第安石固辭不往上嘗密召安石謂曰聞朝廷皆傾心東宮卿宜察之對曰陛下安得亡國之言此必太平之謀耳太子有功於社稷仁明孝友天下所知願陛下無惑讒言上瞿然曰朕知之矣卿勿言時公主在簾下竊聽之以飛語陷安石欲收按之賴郭元振救之得免公主又嘗乘輦邀宰

相於光範門內諷以易置東宮衆皆失色宋璟抗言曰東宮有大功於天下真宗廟社稷之主公主奈何忽有此議璟與姚元之密言於上曰宋王陛下之元子幽王高宗之長孫太平公主交構其間將使東宮不安請出宋王及幽王皆為刺史罷岐薛二王左右羽林使為左右率以事太子太平公主請與武攸暨皆於東都安置上曰朕更無兄弟惟太平一妹豈可遠置東都諸王惟御所處乃先下制云諸王駙馬自今毋得典禁兵見任

者皆改它官頃之上謂侍臣曰術者言五日中當有急  
兵入宮卿等為朕備之張說曰此必讒人欲離間東宮  
願陛下使太子監國則流言自息矣姚元之曰張說所  
言社稷之計也上說二月丙子朔以宋王成器為同州  
刺史幽王守禮為幽州刺史左羽林大將軍岐王隆範  
為左衛率右羽林大將軍薛王隆業為右衛率太平公  
主蒲州安置丁丑命太子監國六品以下除官及徒罪  
以下並取太子處分太平公主聞姚元之宋璟之謀



大怒以讓太子太子懼奏元之璟離間姑兄請從極法  
甲申貶元之為申州刺史璟為楚州刺史丙戌宋王奩  
王亦寢刺史之命夏四月上召羣臣三品以上謂曰  
朕素懷澹泊不以萬乘為貴曩為皇嗣及為太弟皆辭  
不處今欲傳位太子何如羣臣莫對太子使右庶子李  
景伯固辭不許殿中侍御史和逢堯附太平公主言於  
上曰陛下春秋未高方為四海依仰豈得遽爾上乃止  
戊子制凡政事皆取太子處分其軍旅死刑及五品已

上除授皆與太子議然後以聞 夏五月太子請讓位  
於宋王成器不許請召太平公主還京師許之 壬戌  
殿中監竇懷貞為御史大夫同平章事 秋九月庚辰  
以竇懷貞為侍中懷貞每退朝必詣太平公主第時修  
金仙玉真二觀羣臣多諫懷貞獨勸成之身自督役  
冬十月甲辰上御承天門引韋安石郭元振竇懷貞李  
日知張說宣制責以政教多闕水旱為災府庫財竭僚  
吏日滋雖朕之薄德亦輔佐非才安石可佐僕射東都

留守元振可吏部尚書懷貞可左御史大夫日知可戶部尚書說可左丞並罷政事以吏部尚書劉幽求為侍中右散騎常侍魏知古為左散騎常侍太子詹事崔湜為中書侍郎並同中書門下三品中書侍郎陸象先同平章事皆太平公主之志也象先清淨寡欲言論高遠為時人所重湜私侍太平公主公主欲引以為相湜請與象先同升公主不可湜曰然則湜亦不敢當公主乃為之并言於上上不欲用湜公主涕泣以請乃從之

玄宗先天元年蒲州刺史蕭至忠自託於太平公主公  
主引為刑部尚書華州長史蔣欽緒其妹夫也謂之曰  
如子之才何憂不達勿為非分妄求至忠不應欽緒退  
歎曰九代卿族一舉滅之可哀也哉至忠素有雅望嘗  
自公主第門出遇宋璟璟曰非所望於蕭君也至忠笑  
曰善乎宋生之言遽策馬而去 秋七月彗星出西方  
經軒轅入太微至于大角 太平公主使術者言於上  
曰彗所以除舊布新又帝座及心前星皆有變皇太子

當為天子上曰傳德避災吾志決矣太平公主及其黨皆力諫以為不可上曰中宗之時羣姦用事天變屢臻朕時請中宗擇賢子立之以應災異中宗不悅朕憂恐數日不食豈可在彼則能勸之在己則不能邪太子聞之馳入見自投於地叩頭請曰臣以微功不次為嗣懼不克堪未審陛下遽以大位傳之何也上曰社稷所以再安吾之所以得天下皆汝力也今帝座有災故以授汝轉禍為福汝何疑邪太子固辭上曰汝為孝子何必

待柩前然後即位邪太子流涕而出壬辰制傳位於太子太子上表固辭太平公主勸上雖傳位猶宜自總大政上乃語太子曰汝以天下事重欲朕兼理之邪昔舜禪禹猶親巡狩朕雖傳位豈忘家國其軍國大事當兼省之八月庚子玄宗即位尊睿宗為太上皇上皇自稱曰朕命曰誥五日一受朝於太極殿皇帝自稱曰子命曰制敕日受朝於武德殿三品以上除授及大刑政決於上皇錄皆決於皇帝初河內人王琚預於王同

皎之謀亡命傭書於江都上之為太子也琚還長安選補諸暨主簿過謝太子琚至廷中故徐行高視宦者曰殿下在簾內琚曰何謂殿下當今獨有太平公主耳太子遽召見與語琚曰韋庶人弑逆人心不服誅之易耳太平公主武后之子凶猾無比大臣多為之用琚竊憂之太子引與同榻坐泣曰主上同氣唯有太平言之恐傷主上之意不言為患曰深為之奈何琚曰天子之孝異於匹夫當以安宗廟社稷為事蓋主漢昭帝之姊自

幼供養有罪猶誅之為天下者豈顧小節太子悅曰君  
有何藝可與寡人遊琚曰能飛鍊詆嘲太子乃奏為詹  
事府司直日與遊處累遷太子中舍人及即位以為中  
書侍郎是時宰相多太平公主之黨劉幽求與右羽林  
將軍張暉謀以羽林兵誅之使暉密言於上曰竇懷貞  
崔湜岑羲皆因公主得進日夜為謀不輕若不早圖一  
旦事起太上皇何以得安請速誅之臣已與幽求定計  
惟俟陛下之命上深以為然暉洩其謀於侍御史鄧光



賓上大懼遽列上其狀丙辰幽求下獄有司奏幽求等  
離間骨肉罪當死上為言幽求有大功不可殺癸亥流  
幽求于封州張暉于峯州光賓于繡州初崔湜為襄州  
刺史密與譙王重福通書重福遺之金帶重福敗湜當  
死張說劉幽求營護得免既而湜附太平公主與公主  
謀罷說政事以左丞分司東都及幽求流封州湜諷廣  
州都督周利貞使殺之桂州都督景城王暉知其謀留  
幽求不遺利貞屢移牒索之暉不應利貞以聞湜屢逼

暖使遣幽求幽求謂暖曰公拒執政而保流人勢不能  
全徒仰累耳固請詣廣州暖曰公所坐非可絕於朋友  
者也暖因公獲罪無所恨竟逗遛不遣幽求由是得免  
開元元年太平公主依上皇之勢擅權用事與上有隙  
宰相七人五出其門文武之臣太平附之與竇懷貞岑  
羲蕭至忠崔湜及太子少保薛稷雍州長史新興王晉  
左羽林大將軍常元楷知右羽林將軍李慈左金吾將  
軍李欽中書舍人李猷右散騎常侍賈膺福鴻臚卿唐

暖及僧慧範等謀廢立又與宮人元氏謀於赤箭粉中  
實毒進於上晉德良之孫也元楷慈數往來主第相與  
結謀王琚言於上曰事迫矣不可不速發左丞張說自  
東都遣人遺上佩刀意欲上斷割荊州長史崔日用入  
奏事言於上曰太平謀逆有日陛下往在東宮猶為臣  
子若欲討之須用謀力今既光臨大寶但下一制書誰  
敢不從萬一姦宄得志悔之何及上曰誠如卿言直恐  
驚動上皇日用曰天子之孝在於安四海若姦人得志

則社稷為墟安在其為孝乎請先定北軍後收逆黨則  
不驚動上皇矣上以為然以日用為吏部侍郎秋七月  
魏知古告公主欲以是月四日作亂今元楷慈以羽林  
兵突入武德殿懷貞至忠義等於南牙舉兵應之上乃  
與岐王範薛王業郭元振及龍武將軍王毛仲殿中少  
監姜皎太僕少卿李令問尚乘奉御王守一內給事高  
力士果毅李守德等定計誅之皎薨之曾孫令問靖弟  
客師之孫守一仁皎之子力士潘州人也甲子上因王

毛仲取閑廐馬及兵三百餘人與同謀十餘人自武德殿入虔化門召元楷慈先斬之擒膺福猷於內客省以出執至忠義於朝堂皆斬之懷貞逃入溝中自縊死戮其尸改姓曰毒上皇聞變登承天門樓郭元振奏皇帝前奉誥誅竇懷貞等無它也上尋至樓上上皇乃下誥罪狀懷貞等因赦天下惟逆人親黨不赦薛稷賜死於萬年獄乙丑上皇誥自令軍國政刑一皆取皇帝處分朕方無為養志以遂素心是日徙居百福殿太平公主

逃入山寺三日乃出賜死于家公主諸子及黨與死者數十人薛崇簡以數諫其母被撻特免死賜名李官爵如故籍公主家財貨山積珍物侔於御府廐牧羊馬田園息錢收之數年不盡慧範家產亦數十萬緡改新興王晉之姓曰厲初上謀誅竇懷貞等召崔湜將託以心腹湜弟滌謂湜曰主上有問勿有所隱湜不從懷貞等既誅湜與右丞盧藏用俱坐私侍太平公主湜流竇州藏用流瀧州新興王晉臨刑歎曰本為此謀者崔湜今

吾死湜生不亦冤乎會有司鞠宮人元氏元氏引湜同謀進毒乃追賜死於荊州薛稷之子伯陽以尚主免死流嶺南於道自殺初太平公主與其黨謀廢立竇懷貞蕭至忠岑羲崔湜皆以為然陸象先獨以為不可公主曰廢長立少已為不順且又失德若之何不去象先曰既以功立當以罪廢今實無罪象先終不敢從公主怒而去上既誅懷貞等召象先謂曰歲寒知松栢信哉時窮治公主枝黨當坐者衆象先密為申理所全甚多然

未嘗自言當時無知者百官素為公主所善及惡之者  
或黜或陟終歲不盡丁卯上御承天門樓赦天下己巳  
賞功臣郭元振等官爵第舍金帛有差 庚辰中書侍  
郎同平章事陸象先罷為益州長史 八月癸巳以封  
州人劉幽求為左僕射平章軍國大事 九月庚午  
以劉幽求同平章門下三品 冬十一月劉幽求兼侍  
中



通鑑紀事本末卷三十下